

307.25

22

244

2545

癰疽準繩卷之二

癰疽兼證

渴 嘔 痛

出血 瘡僵肉 瘡毒急穿陰入腹

大便瀉利 大便秘結 小便淋瀝頻數

頭痛眩暈 煩躁 自汗盜汗 多痰

喘急 胸痞 目斜視上 四肢沈重

寒熱往來 厥逆 面目浮腫

陽氣脫陷 內癰 肺癰 腸癰

胃脘癰 心癰 腎癰

八癰疽所兼諸證

○渴

大法瘡瘍作渴不問腫潰但脉數發熱而渴用竹葉黃芪湯脉不數不發熱或脉數無力而渴或口乾用補中益氣湯若脉數便秘用清涼飲尺脉洪大按之無力而渴用加減八味丸若治口燥舌黃飲水不歇此丸尤妙

薛瘡瘍作渴若燋痛發熱便利調和者上焦熱也用竹葉石膏湯腫痛發熱大便秘澁者內臟熱也用四順清涼飲燋腫痛甚者熱毒蘊結也用仙方活命飲

漫腫微痛者氣血虛壅也用補中益氣湯若因胃火
消爍而津液短少者用竹葉黃芪湯若因胃氣虛而
不能生津液者用補中益氣湯若因胃氣傷而內亡
津液者用七味白米散若因腎水乾涸作渴或口舌
乾燥者用加減八味丸或先口乾作渴小便頻數而
後患疽或疽愈後作渴飲水或舌黃乾硬小便數而
疽生者尤惡候也苟能逆知其因預服加減八味丸
補中益氣湯以滋化源可免後患

虛者
補之

月癰疽發渴乃氣血兩虛用參芪以補氣歸芩以養
血或忍冬丸黃芪六一湯

熱者
瀉之

伍氏云瘡作渴甚急與神仙追毒丸取下惡毒清膿
湯于金漏蘆湯五香連翹湯六味車螯散萬金散皆
可選用利後仍渴却用生津補氣藥津液生氣血完
渴自止 丹溪曰大渴而與利藥非明示脉證何以
知其當下後言利後仍渴却用補藥又不明言脉證
恐是但有大渴必下下後尙渴方與補藥古人治未
病如此用藥可乎况渴屬上焦當腫瘍時猶或可用
若潰瘍後渴多因氣血之虛何待利後方議其虛也
精要口乾與口渴不同不宜用丹藥鎮墜用之其禍
如反掌用桑枝煎五味湯以救陰水 丹溪曰此妙

方也而不言食味起火怒氣生火房勞激火吾恐渴亦未易除也

李氏云病疽愈後發渴多致不救惟加減八味丸最妙蓋癰疽多因虛而得疽安而渴者服此丸則渴止安而未渴者服此丸永不發渴或未疽而先渴者服此不惟渴止而疽亦不作 薛氏曰前證屬腎水枯涸虛火上炎口乾作渴飲水無度或舌黃作裂小便頻數或痰氣上壅煩躁不寧或二三年先作渴飲水或口舌生瘡兩足發熱痰氣上壅或瘡愈三四年而口乾作渴小便頻數急用前藥多有復生者能逆知

其因預服前丸可免此患若兼手足厥冷真陽虛也
宜服八味丸大凡瘡後審其腎水不足用加減八味
丸中氣虛弱用補中益氣湯氣血虛弱用十全大補
湯陽氣虛寒加薑桂如不應八味丸

托裏消毒散加減法 飲冷作渴熱毒也加赤小豆

知母如不應暫用竹葉黃芪湯 善食作渴胃火

也加石膏山梔天花粉如不應暫用竹葉石膏湯

食少體倦作渴胃氣虛也去芷翹金銀花加人

參白朮如不應暫用補中益氣湯 膿多而作渴

氣血虛也去三味加熟地黃五味子 如不應暫

用十全大補湯加五味子麥門冬 口乾舌燥腎

氣虛也去三味加熟地黃山茱萸山藥如不應兼

六味丸又不應佐以補中益氣湯 自汗內熱口

乾胃氣虛也去三味加參芪歸朮如不應暫用六

君子湯 盜汗內熱口乾陰血虛也去三味加熟

地黃麥門冬五味子如不應暫用當歸六黃湯

竹葉黃芪湯

神秘

治癰疽大渴發熱或瀉或小便如

淋

生地黄

黃芪

各貳錢

當歸

酒拌

淡竹葉

川芎

甘草

炙

黃芩炒

白芍藥炒

人參

括蕞根

石膏

煨各壹錢

麥門冬

去心貳錢

水貳鍾薑叁片煎八分食遠服

薛氏曰前證乃七惡中之一也此方治之其功甚捷亦有左手脉浮大而熱或渴者宜發散表邪右手脉沉實而熱或渴者宜疎去內邪若潰後作渴或小便如淋或脉大而無力者屬氣血虛也宜大補氣血亦有潰後熱不止或作渴遂以爲敗證不治若素有胃火或胃經熱毒未盡胃脉尙數者仍宜服前湯服而脉反大熱愈甚渴愈作斯爲敗證

蓋因真氣虛而邪氣實也今之潰瘍畏石膏黃芩
二藥性冷多不肯服若胃脉未靜非此藥莫能治
也若因循日久煎熬氣血膿血愈多氣血愈虛反
成敗證矣治者當捨證從脉可也大抵瘡瘍之證
七惡內見一二惡甚可畏虛中見惡證者不治實
證無惡候者自愈

托裏黃芪湯 治證同前

黃芪 炒陸錢 甘草 炙

括蕞根 各壹錢

水貳鍾煎捌分頻服之加人參壹錢尤妙

薛氏曰愚用此方治氣虛作渴甚効若氣血俱虛

或膿血大泄作渴或兼發熱者宜托裏養榮湯
托裏養榮湯

人參

黃芪炙

當歸酒拌

芍藥炒

熟地黃

麥門冬去心

川芎

白朮各壹錢

五味子研

炙甘草各伍分

水貳鍾薑三片棗貳枚煎捌分食遠服

黃芪六一湯 常服終身可免癰疽實治渴補虛之

要劑也

綿黃芪

陸兩用淡鹽水潤飯上蒸焙乾

甘草

壹兩一半生一半炙

每剉壹兩水貳鍾煎捌分食遠服 或爲細末每

服貳錢早晨日午白湯調服 加人參尤妙

七味白朮散 治胃氣虛或因尅伐或因吐瀉口乾

作渴飲食少思

白朮

茯苓 去皮

人參 各柒錢

甘草 炙壹兩半

木香 貳錢半

藿香葉 半兩

葛根 壹兩

右爲細末每服叁伍錢白湯調下

竹葉石膏湯 治癰疽胃火盛腫痛作渴

淡竹葉

石膏

桔梗

木通

薄荷

甘草 炙

右薑水煎服

元參散 治癰疽成膿水不能下食心煩口乾煩渴
飲水多四肢羸瘦

元參

黃連 去鬚

土瓜根

麥門冬 去心

赤芍藥

白鮮皮 各壹兩

升麻 柒錢半

火麻仁

川朴硝

川大黃 剉炒各壹兩半

右剉每服叁錢水壹中盞入生地黄壹分細切同煎至陸分去滓不拘時溫服

葛根散 治癰腫熱盛口乾煩渴或時乾嘔

葛根

黃芪

升麻

麥門冬

去心

瓜蒌根

赤芍藥

梔子仁

生地黃

各壹兩

黃芩

柒錢半

甘草

生用
半兩

右剉每服肆錢水壹中盞煎陸分去滓無時溫服

乾葛飲

治發背作渴

黃芩

朴硝

各壹兩
貳錢半

乾葛

壹兩

右剉散每服叁錢用枇杷葉去背上白毛淨洗同

煎不拘時服

忍冬丸

治渴疾既愈預防發疽先將忍冬草入瓶

內後入無灰酒微火煨一宿取出晒乾少加甘草
俱爲末又以所浸餘酒調糊丸如梧桐子大每服
陸柒拾丸溫酒下又治五痔諸瘻

桑枝方大治口渴取嫩桑枝細切壹升炒以水叁升
煎壹升日服五七劑更多尤妙抱朴子云療風痺
乾燥臂痛腳氣四肢拘攣上氣眩暈久服補肺消
食利小便輕身聰明令人光澤其功不能盡述
薛氏曰桑枝補血氣生津液輕身明目補肺腎之
良劑也

五味子湯

治腎水枯涸口燥舌乾

黃芪炒參兩

人參貳兩

五味子

麥門冬

去心各壹兩

粉甘草

炙伍錢

每服伍錢水煎日夜服五七劑

薛氏曰此方乃六一湯生脉散之複方滋化源之

良劑若腎水既涸虛火上炎而口燥作渴者須佐

以加減八味丸

加減八味地黃丸

懷慶地黃

肥大沉水者酒洗淨磁盆盛之大砂鍋內竹棒架起湯浸過盆底原蓋蓋

之濕紙糊縫勿令泄氣以火從已至酉蒸之候冷取出晒極乾秤准捌兩重再如前法蒸之乘

熱杵爛入藥

乾山藥

山茱萸肉

五味子

各肆兩

牡丹皮

白茯苓

澤瀉

酒浸蒸焙
各叁兩

肉桂

貳兩

右各另爲末入地黃和勻加煉蜜丸如梧桐大每服柒捌拾丸空心食前白湯下

李氏曰一貴人病疽未安而渴作日飲水數升子用前方諸醫大笑云此藥若能止渴我輩不復業醫矣仍用木瓜烏梅百藥煎等渴愈甚不得已用此丸三日渴止久服氣血益壯飲食加倍

○嘔

大法精要云嘔逆有二證一證謂初發不會服內托

散伏熱在心一證謂氣虛脾氣不正其伏熱在心者與內托散三兩貼氣虛者宜嘉禾散有寒熱宜正氣散兼與山藥丸以補腎 丹溪曰諸逆衝上嘔噦皆屬於火內託散性涼固有降火之理若嘉禾散補力已少徒溫煖以助火耳山藥丸補腎以壯下焦之陰粗爲近理然治嘔須分先後腫瘍時常毒氣上攻治之潰瘍後當作陰虛治之若年老因疽潰後嘔逆不食者宜參芪白朮膏峻補取効佐使藥隨時隨證加減恐用山藥丸緩急未易得力河間謂瘡瘍嘔者濕氣浸胃也藥中宜倍加白朮